

GIPUZKOA ETA BIZKAIKO KOFRADIETAKO BURUAK KANTAUARI ALDEKOEKIN BILDUKO DIRA GAUR

Hegaluzearentzako ere kuota nahi dute arrantzaleek

Bolantak desagertuko diren arren, baxurako arrantzaleak kezkatu daude. Batetik, Kantauriko kostan inoiz ibili ez diren ontziak agertu direlako iragan udaran; bestetik, bolanteroak desagertu baino gehiago bestelako arrantzontzi bihurtuko direlako.

A. Agirreurreta / Donostia

GIPUZKOA eta BIZKAIKO arrantzale kofradietako buruak Santanderren izango dira, Kantauri aldeko gainontzeko kofradietako ordezkariekin bilera baitute. Bilkura ezohikoa da, Gipuzkoako eta Bizkaiko arrantzaleek duela hogei bat egun eskatuta zeukate-na. Izan ere, baxurako arrantzaleen ustez, hegaluzearen azken kanpaina honetan garbi asko ikusi da gerora itsasoan zein arazo sor daitezkeen. Horri lehenbailen taxuz heltzeko eskatu dute arrantzaleek gaur Santanderren izango den bilkura.

Hegaluzearentzat kuota ezarri edo ez. Hori da arrantzaleek bilkuran eztabaidagai izango dutena. Arrainen %90entzat Bruselak harrapaketa muga (kuota) ezarrita dauka aspalditik. Hegaluzeentzat, ordea, ez.

Arrantzaleek ikusi dute azken urteetan hegaluze harrapaketek behera egin dutela. Oso nabarmen jaitsi dira gainera, kanpainako harrapaketak. Jaime Tejedor Gipuzkoako kofradietako ordezkariak azaldu duenez, «aurten Gipuzkoan iaz baino %42,8 gutxiago hartu dugu. Dirutan, 1.756 milioi pezeta baino ez dira sari portuetara hegaluzearen kanpaina». Jaitsiera horri kuota ezarritik aurrera egin ahal zaiola uste du Tejedorrek, eta horregatik Madrili eta Bruselari harrapaketak mugatzeko sistema ezar dezaten eskatu nahi die Tejedorrek.

Kantauriko gainontzeko kofradietako arrantzaleek eskaera horrekin bat egitea espero dute Gipuzkoako kofradietako ordezkariak, baina hori ez da betere ziurra. Izan ere, Asturiasen eta Galizian arrantzaleek ez dute



Arrain gehien-gehienek kuota ezarrita dute aspalditik. Hegaluzeak, ordea, ez.

ARTXIBOKOA

garbi ikusten kuoten beharra. Nolanahi ere, gaur ikusiko da gehiengo kuoten aldekoa den edo ez.

Zientzialariek ere arrazoia eman diete kuota eskatzen dutenei. Duela lau urte ICCAT hegaluzearen babeserako nazioarteko erakundeak egindako neurketen arabera, hegaluze balibide kopuruak beherako joera hartu du. ICCATek dio komenigarria litza-tekeela harrapaketa presioa jais-tea. Dena dela, horrek berez ere ez du ezer ziurtatzen, «estatistikak eta ikerketa zientifikoak denon gustura moldatutakoak ere izaten direlako», Tejedorrek berak dioenez.

Eskoziako ontzia • Itsas baliabideen egoeraz gainera, badira kezkatzeko bestelako arrazoiak ere, baxurako arrantzaleek diotenez. Iragan udaran lehenbizikoz, Eskoziako ontzi bat ikusi zuten Kantauri aldeko kostan. «Gutziz legala da, jakina. Baita milaka eta milaka ontzi etortzea ere, eta dena hustutzea ere bai». Baina, baxurako arrantzaleek horri aurre hartu nahi diote, berandu izan baino lehen.

«Azken hamar urteetan egundoko arazoak izan ditugu bolanteroekin. Haiek desagertuko dira, nahiz eta oraindik beste lau kanpainiatan jardun beharko dugun elkarrekin», dio Tejedorrek.

Bruselak lau urteko epea eman die bolanteroei desagertzeko. Laguntzak ere izango dituzte ontzi mota horiek bestelako arrantza motetara egokitzeko beharrezko inbertsioak egin ditzaten. Baxurako arrantzaleek diote Europako bolanteroek arrantza mota hori utzita ere jarriko dituzten arrantza tresnak ez direla bolantak baino askoz hobeak izango. «Susmoak badi-tugu. Europako hainbat hedabidetan ikusi dugunez, bolanteroek beste arrantza mota batzuk jarriko dituzte, eta horiek ez dira bolantak baino hobeak izango». Hori ere izango dute gaur hizpide Santanderren. X

Arabako enpresariak 177 laguntza mota dituzte

Laguntza horiek guztiak liburu batean bildu ditu SEA elkarteak

Efe / Gasteiz

ARABAKO enpresariak 177 laguntza mota jaso ditzakete erakunde publikoetatik, hain zuzen ere EAEko erakundee-tatik, Madrildik eta Europako Batasunetik. Halaxe jakinarazi du SEA enpresari arabarren elkarteak, laguntza hauek gida-liburu batean bildu baitituzte.

Jose Zurita SEAk idazkariak eta Gregorio Alonso Arabako Garapen diputatuak liburu horren 16. alea aurkeztu zuten atzo, baina enpresariak Interneten bidez ere kontsulta egin lezakete (www.sea.es). Liburu horren helburua da erakundeen eskaintako laguntzak enpresa txikien arduradunen eskutik jartzea.

Alonsok azpimarratu duenez, gida hori «leihatila bakar-rerako urrats bat da», hau da, enpresariak erakunde guztietan jaso dezaketen laguntzaren inguruko informazioa leihatila bakarrean biltzeko urratsa. X

Enpleguari buruzko jardunaldiak Bilbon

Erredakzioa / Bilbo

ERAKUNDE, sindikatu eta enpresari elkarteetako ordezkariak hartuko dute parte azaroan eta abenduan Bilbon egiteko den Enpleguari buruzko Eztabaidarako Jardunaldietan. Jardunaldi horiek Bilboko Udaleko Enplegu, Enakume eta Ingurugiro sailak antolatu ditu, eta saioak ostegunero izango dira, abenduaren 3ra arte.

Jardunaldi hauek antolatzeko erabakia EAJ, PSE eta EB alderdiek hartu zuten. Haien asmoa «enpleguari lotutako sektore guztiak elkartzea» izan da, «lanaren inguruko arazoak aztertu eta konponbideak aurkitzen ahalegintzeko», azaldu du Antonio Bartolome zinegotziak.

Bilbo inguruko lan merkatuaren egoera, enpleguaren banaketa, enpleguaren eta prestakuntzaren sustapena, lan arriskuen prebentzioa eta lan merkatuko bitartekaritza izango dira jardunaldietako gai nagusiak. X

EAEko industri prezioak %0,1 jaitsi dira irailean, petroliotik eratorritako produktuen eraginez

Aurtengo lehenengo bederatzi hilabeteetan energia %15,5 merkatu da, iazko epe berarekin alderatuta

Efe / Gasteiz

INDUSTRI produktuen prezioak (IPI) %0,1 jaitsi ziren Euskal Autonomia Erkidegoan (EAE) iragan irailean, petroliotik eratorritako produktuen jaitsieraren eraginez.

Jaitsiera horren ostean, IPIren jaitsiera %0,8koa izan da azken urtean, hau da, iazko irailetik aurtengo irailera, Eustat estatistika erakundeak atzo jakinarazi duenez.

Aurtengo lehenengo bederatzi

hilabeteetan industri prezioek %1eko jaitsiera nabarmena izan dutela azpimarratu du Eustatek. Horren eragile nagusia petrolio produktuak dira. Horri esker, energia sektoreko produktuen prezio indizeak %15,5 egin du behera bederatzi hilabete hauetan. Petroliotik eratorritako produktuen salneurriek ere behera egin dute, eta ondorioz ugaritu egin da industria prezioetako jaitsiera.

Industri produktuen helburu ekonomikoaren arabera, ekipa-

ondasunen prezioak %2 egin dute gora urteko hirugarren hiru hilabetearen bukaeran, eta kontsumo ondasunenak %1,3.

Bitarteko ondasunek, berriz, aurreko hilabeteetako joera negatiboari eutsi diote, %4ko prezio jaitsierarekin, aipatutako energiaren merkatzeak eraginda, betiere Eustat estatistika zerbitzu ofizialak zabalduetako emaitzen arabera.

Industri atalak banaka hartuta, iragan irailean garraioko materialak %3,5 egin dute gora,

makineriak %3,4, zur eta altzaruek %2,5, paper eta grafikak %2,5 eta metalezko artikuluek %2,2. Prezioak merkatu zituzten atalak, berriz, energia eta kimikak izan dira, hurrenez hurren %16,6 eta %0,5 beherakadekin.

Azkenik, ondasunen prezioen gorabehera, urtetik urtera neur-tuta, honako hau izan da: ekipa ondasunak %2,5 garestitu dira, kontsumo ondasunak 1,6, eta bitarteko ondasunak %3,6 merkatu dira, Gasteizeko Gobernu-ko estatistika zerbitzuen arabera. X

Bechstein piano bat erosteagatik lau ahotseko trikitixa bat oparitzen dugu.

J Bengoa

Bulebarreko Arkupeetan - DONOSTIA